

卷之九
利

人民部

藝文志

記
書說類
疏
咨

議
策
書後
辨

條陳類

文安縣志

九冊

文安縣志卷之九

利

人民部

藝文志

重修文廟記

元尚野

文安廟學貞祐甲戌金主南渡焚蕩殆盡僅存大觀八行之碑宋遼金祚終皇元受命奄有中夏戊戌肇開貢舉草昧漸革世祖潛藩賓禮師儒延問治道務先學校卽位明年特降詔條欽崇宣聖光賁儒宮至元三年勅上都建孔子廟又以中書左丞許衡爲國子祭酒以教胄子用敦化源四方萬里莫不知所振厲黽勉從事文安近在畿內獨無以應德意二仲釋奠卽其故基表以草幕苟簡不恭習以爲常觀者惻然八年辛未縣設教諭以邑儒董君榮爲之董君素有興復議而病未能也卽言於縣以國家方事襄樊爲平宋張本俎豆軍旅不獲所請遂以自任營積八年江淮嶺

海悉歸版圖明年庚辰以屋賃錢合若干緡伐木湯川往返千里三歷寒暑衆材始聚瓦甃釘礎堊黝丹漆各輸所有以後爲恥卜曰其吉工力並作不期月禮殿四楹宏敞靚深先聖先師十哲像設顯嚴如一大府惟從祀之室大成之門經畫井井未克畢舉今復七歲矣主簿姚元縣尉張瑛縣尹楊潤今縣令李侯祐感嘆興起相繼而輔成之二十八年兩廡翼翼繪像七十二子董君旣沒其子道清學正孫禎教諭承其事如君存焉大德辛丑後以講堂前以櫺星至大四年以雀育廡屋瓦易版以甌初講堂有闕至是戶牖端朗階趾堅整燦然一新李侯倅來謂予曰文安廟學之廢迄於董君經始之前爲荆棘瓦礫者六十六年董君父子祖孫勤苦堅懇四十餘年始終一意卒成盛事佑慮歲月之久有攘沒其美者請文勒諸石永資名教野旣允佑之請且以邑之令佐於王事鞅掌之暇與董君父子祖孫共成學廟喜其民牧學官克協終始因併附此以示無窮耳翰

林國史院檢閱李鼎賡而贊之曰皞皞太古赫赫斯文三五尊諸時稱聖君夫子崇德穆道充拓而擴之執其大中綱常既立彝倫攸叙萬物蒼蒼咸得其所尼於周衰陬於強秦漢唐以來或屈或信皇元統一尙儒惟實廣建辟靡燿燿星日曩者太陽學舍荒涼茅茨階陛葛纍垣牆爰有董公憂心忡忡質宅營構未遂而終厥孫嗣事傷悼先志諮諏邑侯侯忠其義未幾落成殿屋崢嶸邑侯之仁郡教之誠匪人不格匪誠不感宜勒堅珉永爲勝覽

邑令吳君德政碑記

元 人

國家設百司庶位惟以治安天下撫字黎元爲務然職乎民者郡之守邑之令雖維二人而令尤邇民其縣之休戚俗之微惡係焉苟非公勤廉慎明敏果決寬猛得宜者曷以勝其任哉延祐己未仲冬初吉國子博士八撤忽都魯介助教潘澤長史李君讓以所述文安尹吳君行實示予曰尹

下車迄今秩滿而治績著聞耆宿趙璧等欲爲立石願文之以播其美幸無讓爲予嘉夫邑令尹從事之勤鄉人好善之篤暨三子請謁之固未易以不敏辭按君吳姓杭人名質字之文幼以明經進法律之學尤所精遂繇刑曹入掾中書銓衡器其能調廣平幙長而婉畫深謀綜理郡縣之政咸適其平內外莫不歎服如肥鄉有盜宰他人之畜胥食其肉欲縱而勿論君爲禁治武安縣僚方以貪污被詰輒還其職君劾而停之榆林郡夫方以貧乏是訴友益其需君較而削之以至置學宮之書類架閣之牘靡不淑意則其施爲有素概可見矣延祐四禮官承仕郎來尹是邑蒞事之初謁宣聖廟觀學校弛廢席久虛乏詢其故以爲無土產之贍遂悉心營度得縣之北鄉石溝港蕪田四頃五十畝親詣其畔命工揭石於大成殿之西用給粢盛廩餼之費文物浸興由茲始君每巡鄉勸農不以吏從第令社學儒生代書教以播種畦桑躬詣督責勤者獎惰者懲民勸而致効

農隙之月謹庠序申孝弟民化而向義君嘗周覽縣境地形東北俱下潯
沱河水泛溢民田具以陳仲溫所言利病稟於上官疏河築堰應役之工
取戶大丁衆者充之度地施力民不知擾而厥功告成水退獲粒食之田
畝頃計者五百有畸可謂一勞永逸暫費永寧折鹽戶額歷年既遠物力
增損不同及影匿勢戶皆閱實均俵先是催徵納結之際民苦其責君約
以三甲輪之卒不勞而辦芻場役夫昔從鄉正高下其手君驗以有力者
隨月就役飼馬之所歲占萬氏地厩之所需重歛於民君以田歸其主即
官曠地創瓦舍爲楹三十有四芻豢巫秣之具備焉前此稱傳者至縣卽
取民馬轉送君勸率僚吏循還遞之民俗習爲奢僭婚嫁失時示以三等
例禁使貧富適宜以信符妨農惟用之於金穀刑名並置訟簿狀牌隨其
事之輕重期日而決屯田冒編劉氏地君究其情卽判而歸之向以水患
民逋於四方君招誘復業又值饑年告糧振濟幾千餘戶又以彌盜之畧

粉諸門壁籍其戶名更相保攝仍革換候館廝養之徒戒以勿得羣聚宵出牧踐於野境內寧謐無攘竊之虞嗚呼君之爲縣興便去弊曲盡其力蓋處心以公而不以私也邑之民於及瓜之後惓惓不忘其惠特勒銘以頌德非有愛民之實者能致是歟雖然觀其行之迹不瑣瑣以求細不紛紛以鈞聲可謂能且才矣俾凡承流宣化之官咸以此心爲心何患乎天下之不底治黎民之不得其所哉故表而書之庶幾後來亦將有聞風而興起者焉其辭曰維邑之令職最親民治否休戚實係其人侃侃吳君繇部掾省繼進名藩爲郡挈領霸之文安號爲難治君僅三年績著五事下車之日首謁儒官闢田養士丕變文風勸農樹藝罰惰旌勤禾稼壠上茂茂如雲農隙之日迺立鄉庠修其孝弟教以義方疇昔潯水蕩析民居若疏其勢患已遠除曩者秣馬歲占民田君卽曠地創舉翼然轉送傳車數煩民騎君勸吏僚循環更遞俗尙奢僭婚嫁失時君示三例使適厥宜念

彼信符妨農未便金穀刑名用之斯善置爾訟簿與爾狀牌隨事輕重期日而裁載籍屯田冒編劉氏爰究其情輒歸其地水患時至民逋四方加意招誘咸復舊疆饑饉薦臻孳者填路舉廩賑濟幾千餘戶慮盜竊發方略是施排門粉壁令各保持戒令候館及廨養者宵勿羣聚出踐郊野君績既成境內肅清犢以刀易犬不夜驚偉哉施設利興弊革存心以公愛人以德惠愛所遺去而益思觀棠有咏墮淚有碑凡今爲縣不知其幾使皆如君世安不理託諸石鐫庸表厥賢來者聞風庶幾勸焉

張氏先塋碑記

奉訓大夫

缺二字

州知州

缺二字

本州諸憲典

缺二字

勸農事張我鑛奉訓大夫

缺二十
六字

歲丙午正月

缺一字

戊

缺一字

武校尉涿州判官張狀其世次如

缺二十
二字

京師

缺六
字

曰惟我考以力田

缺一
字

粟賑災周匱蒙聖上

缺五
字

幸賴庇叨厠

郡僚之未祿不終養兆失所天言念蓼莪之義

缺七
字

故事將揭一石於

缺一
字

昭示後昆德不致湮沒

字六

以至澤及存沒矣愚維其誠雅意不可終

辭遂叙而銘焉按張氏世居霸州文安縣

字三

大父維在畎畝慨然恒有

字八

水旱兼發以濟人

字一

以全活者甚衆鄉人負其財爭者必曰汝不

愧張氏乎其信重

字二

娶

字一

氏生大父

字四

未冠會壬辰之亂父母俱

歿於兵

字二

時河南饑荒上下無統強焉凌弱衆焉暴寡孰得而控制之

故其遺昆習狃捍忍日相

字四

有顏張三俠各統

字二

百人

字十

有姓者

泣告曰我闔門久賴張氏撫字無地可酬我肥且碩願代死以濟衆

字四

而

字十

散亡

字十

不數年以致豐腴旁近貧乏者或貲粟積六十年

字三

八月二十三日

字四

卒生父伯用四女俱適士

字四

族伯用字春和謹愿

寬恕

字四

喜怒不形於色物我無間諸心儲振支歲外悉

字七

赴人之急

如恐不及至元十八年父

字十

不差乃默禱於天誓代其死夜夢神賜二

字二

既寤

字七

十九年

字三

民

字二十

梁仲友等狀其事以聞拱衛

字六

太

醫院

字缺四

府司大卿王伯順入奏

字缺七

世祖

字缺一

歲十一月乙亥並次子

召見

字缺二

上問其齒對六十有二問濟民今經幾載對以祖考以來幾二

百年矣

字缺九

上以張氏以慈救苦若

字缺一

問有是心曰以好人目之顧謂

中書右丞相完澤曰汝等

字缺五

天下民無饑困

字缺四

賜之錢一

字缺一

貫

字以無功竟不果受

字缺四

賜食殿中仍賜

字缺一

一領金鈎王環金頭玉杖

玻璃瓶蓋

字缺二

瓶蓋復諭完澤暨平章政事不忽謀曰

字缺三

奕美父善子

不惡好人之子

字缺三

令仕途試中書省軍使乙卯冬

字缺一

復賜

字缺一

坐公

於百僚之右大陳樂隊使觀之因問農桑事應對甚悉

字缺十

上佳其

字缺一

質因諭以調護

字缺四

及出目送久之三十年春

字缺一

駕幸上都六月勅中

書平章政事梁俺都刺就賜雲南所貢玉仙於其家十月公

字缺三

百斛以

獻復賜錢二千五百緡辭其半受之以大德九年九月十九日遭病而終

先期自白云吾明日逝矣因置酒徧嘗親舊為訣遺戒子孫曰祖宗積德

久矣迨我

字缺三

國寵自慚過分若等孜孜爲善不墜前功余瞑目地下矣

以遠近負欠文券五千餘緡悉焚之服所賜衣帽

字缺一

飲酒之寶急令據

床當戶是日捐館其明了如此享年七十有六祔葬於先塋禮也配劉氏

先公卒子四人長曰璉字國器娶王氏次卽敦武曰玉字國寶阿買小字

也娶王氏自中書宣使奉旨授霸州知州父伯用辭以越次暴貴不祥改

沂尹秩滿受今職玉性孝弟清儉律已寬厚

字缺三

以廉能稱次曰珪字國

瑞娶傅氏次曰璘字國珍

字缺四

適李氏之子繼妻高氏一女適高氏子男

孫三人皆幼嗚呼古語有之源深則流廣積厚則傳遠觀張

字缺一

氏

字缺一

世以致天子寵賚遐邇間想聞其風采彼饕餮忘身之儔豈同年而語哉

竊謂以財發身積而能散出於天理之正其慶垂奕世世子孫金紫一門

忠孝蓋有所自云銘曰張氏之源清河其先先繁文安之一族邈不知幾

代之弗遷但善稼而爲農師分端倪而耕田貯糧爲珍珠璣爲賤惟知濟

饑夫於凶年兵塵

字缺二

於河

字缺二

急脫命乎血吻之迫德培義漑濟困持

顛救寒袴襦療饑糜饘具三

字缺二

有

字缺二

義楚不減於前

字缺三

海而

字缺一

四民沐膾炙之口聲聞於九年布衣五造於禁闥契淵衷而沐雨露之徧

御衣其鮮寶器其全子孫朱紫四馬駙駙詳於問之

字缺一

乎八埏

字缺三

以

福根之固永廣漣漪以

字缺一

之延其陰積夥而陽報乃彰我知理勢之必

然艾子之原張氏之阡刻貞珉而發魂於九泉

修城隍廟碑記

明王 陞

城隍之名自國朝始其山川之靈氣蒼黎之精神實憑嚮焉而吾邑最顯著邑澤國也滹沱以北之水以我為委故今堤環之決則數年不可耒耜已亥秋水漲甚雄鄭皆匯為巨浸其水橫流數十里濤聲波光山頽霆擊防者以急告邑侯岳君欲以身護之且邀惠於神曰蕭竹之不具鍾畚之不力長吏罪也而風雨雷電之不時以佐水虐神其謂長吏何與其以璧

馬乞靈於玄冥也孰若爲民請命於神明長吏且負薪堤上與百姓從事矣無何陰雲匝地風起乾方驟雨急電天色慘黯里之縉紳父老相顧歎詫堤壞矣須臾而霽不風不雨者浹旬而堤得無恙是歲也穡人成功汚邪坻積百姓懷侯之明德烹羔酌觥以躋公堂邑侯謝不敏曰神之惠也異日之風伯雨師若有主者以驅之不然吾卽効王尊投陽侯之波何益哉百姓又相從新廟貌拓廟之門宇事竣而屬不佞陞記之陞嘗讀吾師按察碑記文在是矣復何能贅雖然常以臆論之世治有鬼神之用而其迹隱世亂有鬼神之迹而其用彰其易如天其簡如地就之如日望之如雲潤之如雨露震之如雷震則天地鬼神之功化且歛而歸於無世所稱福善禍淫持世之說鬼神之所待衰俗者耳以邑侯明察之官忠信之長慈惠之師其政治者也其與神交成以各協其職也惟神有德唯侯代之今邑侯遷秩去百姓攀轅不可得民又將歸望於神矣長吏之所司者陽

法也神之所司者陰德也紀綱總之有司風俗散之百姓以神之聰明正直不蘄世淆而顯其用使百姓潰焉如水之波流而不知防也啓聰予鑒俾淳而不漓樸而不雕平而不競嗇而不侈則庶幾於先民之法度後之捧檄以照臨吾土者以爲蒲鞭可以臥理也則山川之靈氣蒼黎之精神唯神聽之矣

修城記

李時

文安畿內邑也距京師二百餘里當瀛霸之衝城而邑者舊矣承平旣久無兵革之虞有司玩於豫防歲就傾頓久之益加夷焉正德辛未河北盜起標掠諸州縣已而大衆屯聚文安文安視他州縣荼毒獨甚坐城之廢故也歲癸酉齊東王君來尹是邑顧而歎曰民保於城城關於令城之廢民弗能生矣伊誰之責歟廼集邑耆舊諭之曰爾民非城無以自衛今僅存遺址爾民將何賴乎予欲藉爾力繕城以保爾生於爾何如耆舊咸曰

是固侯之生我也敢不惟命君乃鳩工顧所費不貲莫可猝辦復曰吾民如沉疴始脫而體實羸予不欲重費吾民倘撤土成城因以濬池豈曰省費而功亦易集矣遂絜高卑度厚薄具楨幹畚鍤雲集併力交作興役於甲戌三月閱明年乙亥秋迺訖工焉城周迴九里高若干丈列雉堞建樓櫓題其門額南曰來薰北曰拱辰東曰迎恩西曰永定謹扃鑰以詰奸僞置鍾簾以警晨昏由是文安之民咸欣欣焉賴以無恐鄉進士王君克敬邑之彥也懼王侯之功泯於後來徵予言以記予惟古稱設險以守國又爲城池以爲固申畫郊圻慎固封守則城隍之設固有司所不廢者然出車之詩有曰天子命我城彼朔方蒸民之詩曰王命仲山甫城彼東方夫以玃狁之難甚亟朔方之城迺須天子之命齊遷臨淄仲山甫以上卿臨焉古之不敢輕用民力如此是以春秋之義凡用民必書不時害義固加貶矣雖時且義亦書見勞民爲重事爾今王君成城以衛民誠使以佚道

而非輕於用民者是可書也已若夫遂生養以興教化俾風俗和洽而不勞民於守國之末是又王君之當務者君名鼎字公實能於其政觀此可概其餘矣相是役者縣丞王景沂云

崔令公去思碑記

邢孔陽

檢舊史吾邑受太行西麓之水以十數注雍奴下天津轉輸於海自何承矩塘灤廢墟池玳瑁開殫爲河延祐中吳公質疏河築堰至我明史公天祐益拓而延袤之以里計者百有二十防植田闢歲穰民和自甲辰穿於鄰蟻丁未辛亥復兩失其防鰵鱸舞於町疃舳舻維於麗譙絲役之不平而富者貧萑苻之弗懲而良者懼其憑城依社者復飛食里中天若哀我遺黎錫吾崔侯客歲首夏來蒞茲土知長堤爲民司命甫下車躬率丁夫補苴其單薄而繕完其罅漏平戎易城悉據吾邑上游平戎力微弗逮侯與之協修易城芥視伊八村民而因以芥吾民侯則與之代修往時收經